

9. marts 2012

UPA 2012/85

Inatsisartut suleriaasiat § 33 naapertorlugu ima ittumik inatsisartut aalajangiiffigisassaattut siunner-suuteqarpugut.

Meeqqap naartuunerani peqqissuunissaa anguniarlugu, angajoqqaanngortussallu hashimik imigassamilluunniit naartunermi milutitsinermilu ajornartorsiuteqartut, siusinaartumik katsorsarneqarsinnaanerannut periarfissikkumallugit Naalakkersuisutigut iliuusissanik ersarissaasoqarnissaanik kiisalu katsorsarneqareernerisa kingorna malinnaavigineqarnissaat, paasissutissanik katersisoqarnissaa siunertaralugu, Naalakkersuisut suliniuteqaqqullugit aalajangiiffigisassatut siunnersuut.

(Inatsisartunut ilaasortat Aleqa Hammond & Ruth Heilmann, Siumut)

Tungavilersuut

Siumup sulissutigiarppaa meeqqat inuusuttullu toqqissisimasut, peqqissut, tarnikkut timikkullu nukittuut kinaassutsiminnillu ilisimaarinnittut pilersissallugit.

Nuannaarutigaarput tulluusimaarutigalugulu ilaqutariippasuit nukittuut perorsaalluartut aammalu aqutissiuussilluartut nunatsinni innuttarigatsigit.

Ajoraluartumilli ilaqutariit tamarmik nukissaqartuunngillat, aammalu amerlaqaat inuusuttullutik angajoqqaanngortussat siunnersortariaqartullu. Nukissaalatsineq immaqalu aamma suliffissaqan-ngineq ilinniagaqarnissamut isinngitsoorneq imaluunniit siunnersorneqarnissamik amigaateqarneq aammalu meeraanerminniluunniit sumiginnagaanermik atugaqarsimasinnaasuullutik.

Piffissami kingullermi tusagassiutit aqutigalugit tusarsaajualerpoq naartusut ikiaroorartumik atuisut amerliartornerat, tamassumalu annilaarnartuunera eqqarsarnartoqarpoq, siusissukkullu iliuuseqarnissamut katsorsaanissamullu periarfissaasunik ersarissaasoqarnissa Naalakkersuinikkut pisariaqartitsisoqarneranik takutitsilluni.

Nuna tamakkerlugu pisariaqartitsisoqarnera aallaavigalugu piffinni peqqinnissaqarfii, nunaqarfillu suleqatigalugit angajoqqaanngortussanik siusissukkut siunnersuinerit katsorsaanerillu imminut iliuuseqarnerusoq iluaqutinngortussaq. Iliuuseqarneq tassaassaaq inuiaqatigiittut imminut susassa-reqatigiinnermut perorsaanikkullu pitsaanersumik angusaarnissamut siunniussaarnermut aqutissiuuseqataasussaq. Angajoqqaanngortussat imminnut tatiginerullutik meeqqaminnut perorsanis-saannut sakkussaqaalernissaat kiisalu angajoqqaatiminnik isumammanik immersoqatigiissinnaanermik pilersitsinissamut aqutissatsialak.

Kiisalu ullumikkut ullunilu kingullerni tusarsaajualersoq allaat naartusut ikiaroorartumik atuisun-ngorsimanerat annilaarnarmat siusissukkut iliuitsinut ilaatilluinnarlugu naartusut katsorsarne-qarnissamik tamatigut periarfissiinissap ammaanneqarnissaanik suliniutaasut ilaneqarnissaanik ilungersortumik iliuuseqarfigineqartariaqarmat.

Immikkut pisariaqartitsisut suuneri amerlasuutigut taagorneqarsinnaapput. Isumaqarpugulli naartusut aammalu meerartaarsimasut ornittagaqarnissaminnik amigaateqartaqimmata, tas-suunakkut kommunit suleqatigalugit tamanut nunarput tamaat nunaqarfiillu aamma minin-nagit naartusut meerartaartullu angajoqqaajusut naapittarfeqarnissaat isumalerujussuusoq ta-persersoqatigiinnissamut susassareqatigiinnissamullu periarfissiilluarsinnaammat angajoqqaatut siunnersorneqarnissamik immersorneqarnissamik tamassumap nalaa pingaartumik pisari-aqartit-singaarfiusarmat aammalu perorsaaniikkut pitsaanersusumik angusaqarnissamik im-mersuutaa-sinnaasunik pissarsiffiusartussaana qularutigineqassanngimmat allanik naapi-taqarluni oqaloqa-teqarlunilu ingerlaaseqarneq nukissanik isumassanik imminullu tatigineru-lernermik kinguneqartus-saammat, angajoqqaajusunut meeqqamullu pitsaasumik sunniuteqar-nissaa qularutigineqassanngimmat taamaattumik aalajangersimasumik ornittagaqalernikkut angusassarpassuaqalersitsilluni.

Aningaasaqarnikkut allaffissornikkullu siunnersuutip pisortanut sunniutissai.

Aningaasat aalajangiiffigisassatut siunnersuummut pineqartunut atugassat konto pingaaneq 30.10.45, **27.1 mio. Kr. -inik** aningaasartaqartumi, ilaatigut ima oqaasertartumi aaneqarsinnaanerat siunnersuutigineqassaaq:

Angajoqqaanngortussanut pikkorissartitsineq:

Inatsisartut 2006-mi akuersissutigaa angajoqqaanngortussanut pikkorissartitsinerit aallartin-neqassasut, angajoqqaanngortussat meerartassartik pitsaanerpaamik aallartissinnaanissaaangun-iarlugu sakkussa qarlutillu iitersuunneqarneqarnissaat anguniarlugu. Pikkorissartitsinerit ilaquta-riinnut sullissivinni tassungaluunniit atasumik ingerlanneqarsinnaapput.

Siunnersuutip innuttaasunut aningaasatigut allaffissornikkullu sunniutissai.

Siunnersuut toqqaannartumik innuttaasunut sunniuteqassanngilaq.

Siunnersuutip aningaasatigut allaffissornikkullu namminersortunut sunniutissai.

Siunnersuut aningaasatingut allaffissornikkut namminersortunullu sunniutissaqanngilaq.